


Hubentud den Movecion

Skirbi pa Mercedes Abdul

Ban yuda "The Salomon's Sisters" duna un concierto Gospel pa nos hubentud



E distrito di San Nicolas ta conta cu hopi hoben valioso, loke den diferente ocasion ta ser muestra, por ehemplo, a traves di musica y deporte. Awe Seccion Hubentud den Movecion ta trece "riba stage" tres hobencita sumamente simpatico, cariñoso, y cu un tremendo voz!.

Ta trata di Judy-Leigh, Emilia y Stacia Salmon, integrantes di e grupo "The Salmon's Sisters", cu ta dedica na musica Gospel.

"The Salmon's Sisters" a lanta mas of menos 8 aña pasa cu e meta di canta pa Señor y tambe trece alegría y consuelo unda cu tin tristeza, y ademas mensahenan di paz, amor, fe y hermandad.

Activamente e grupo ta participa den diferente misa, cas di anciano, etc, y a duna dos concierto pafu di Aruba. Na december '97 nan a bishita Bonaire pa presenta na Hotel Flamingo y na Curacao durante un concierto hubenil, y tambe nan a haya oportunidad di canta na diferente misa.

E grupo a bishita nos seccion pa hubentud pa e publico cera conoci un poco mas cu su integrantes, y e meta cu e grupo tin.

JUDY-LEIGH:

"Mi ta bayendo Colegio Arubano E12, y den mi tempo liber mi ta canta. Ami cu mi rumannan a lanta den un familia cu fe Cristian y for di chiquito semper mi a gusta canta pa Jesus. Mi mes ta compone e canticnan y nan melodia di e cancionnan cu nos ta canta.

Mi meta pa futuro ta pa studia "Biologie en Laboratorium Onderzoek" ya cu mi anhelo ta haci algo pa yuda otro hendenan, manera investiga cierto malesanan cu ta afectando e humanidad".

EMILIA:

"Mi ta alumno di Abraham de Veer MAVO School, 3de klas. Mi ta canta y toca piano den mi tempo liber. Ami tambe for di chiquito mi ta gusta canta musica Gospel, specialmente pa su palabranan di amor, paz, union, cu ta loke Dios kier pa reina entre nos tur. Den futuro lo mi kier bira abogado of recherche cu tambe ta un manera di yuda hende".

STACIA:

"Mi ta bayendo Abraham de Veer School, Eerste Klas-A. Ya cu nos a lanta den un ambiente rico spiritualmente mescos cu mi rumannan mi tambe for di chiquito a gusta musica Gospel, cu semper ta trece un mensahe diferente y ademas ta musica suave. Arquitectura ta e carera cu lo mi kier scoge pa futuro, pasobra mi sa pinta bon y mi ta gusta traha cas di palo of carton, cu su cambarnan, cushina, comedor, etc".

Stacia su rumannan a bisa cu e casnan cu e ta traha ta masha bon termina mes, cu ta parce di berdad, pero traha pa pop-chi.

SIGUIENTE META

"The Salmon's Sister's" tin como siguiente meta organiza un concierto grandi di musica Gospel den cual nan ta desea di haya un publico grandi.

"For di hopi tempo caba nos tin intencion di duna un concierto pa un publico grandi, pero pa haci esaki nos mester di cooperacion di algun instancia ya cu espacionan pa haci actividadnan publico ta costoso, mientras cu nos meta no ta comercial y nos no tin fondo pa cubri gastonan asina".

A traves di Seccion Hubentud den Movecion e grupo kier a haci un yamada na instancianan manera Sociedad

Bolivariana, Cas di Cultura, Instituto di Cultura, etc, pa wak ki posibilidad nan tin pa yuda e hobennan aki cu facilidad pa duna e concierto aki.

"E meta cu nos tin pa duna un concierto pa un publico grandi ta pa trece como mensahe cu Dios tambe mester forma parti di nos bida, pasobra e ta nos Creador.

Nos kier dirigi nos concierto na tur hende: mucha, hoben y adulto pero specialmente pa nos hubentud cu hopi biaha no ta conciente cu nan tambe mester di Dios den nan bida".

PA CONTACTO

Instancia di personanan cu ta interesa pa yuda "The Salmon's Sister's" presenta nan concierto por yama na telefon 842486, of personalmente na Pos Chiquito 217.

MENSAHE PA NOS HUBENTUD

Judy-Leigh, Emilia y Stacia tin e siguiente mensahe pa nos hubentud:

"Corda semper riba Señor cu ta Esun cu a crea nos y no lague ni un instante. E verdadero felicidad y seguridad ta den DJE".

Na final di nos entrevista e tres hoben a dedica e redactora di e seccion aki un can-

cion, y mester bisa cu e emocion tabata enorme. E tres hobencitanan aki ta forma un trio di voz precioso sin acompañamento musical mes, corda ora tur cos den armonia cu otro...

Tambe mester resalta cu e letra di e cantica ta sumamente bunita, y posiblemente nan lo laga e seccion aki publique otro siman, pa asina nos lectornan, y instancianan cu por yuda nan realiza nan soño di duna un concierto grandi, por constata e calidad di composicion cu "The Salmon's Sisters" sa brinda.

Riba potret por mira e tres preciosidad di mucha; tres rumannan cu ta forma parti di e hubentud positivo di San Nicolas cu gran apoyo y aporte di nan mayornan loke ta algo hopi bunita mes.



PROFAR'S EDUCATION INSTITUTE

a division of Profar Consultancy N.V.
Director Drs. R. H. Michel

PROGRAMANAN PA HUBENTUD:

GUIA COMPLETO Y PROFESIONAL

DESPUES DI SKOL

pa alumnonan di

MAVO/ HAVO/ VWO

> Guia cu Huiswerk

> Apoyo Individual

> Atencion Special pa

pw/cp/soly examen

> Metodonan di Studia

Cambia bo estilo di studia y mehora bo resultadonan escolar !!

TESTNAN SICOLOGICO PA YUDA DETERMINA BO:

Vakkenpakket

Futuro Estudio/ Profesion

Personalidad y Caracter

Capacidadnan escolar

Escohe debidamente cu testnan profesional !!

COUNSELING Y AYUDO PROFESIONAL PA HUBENTUD entre otro:

Tension y Depresividad

Miedo di faya pa examen

Problemanan familiar, escolar y personal

No warda te ta mucho laat.

Papia cu un profesional y

soluciona bo problemanan!!

Pa mas informacion:

YAMA TEL 27926

entre 10 am y 8 pm

Lucitta Michel-Cealre, mng.dir.

PEPSI

PA GENERACION DI FUTURO